

【暗晡頭个海脣】彭瑞珠原作

暗晡頭个海脣，無麼个人，天頂个月光，畏羞个囡在雲背；拘禮个海風，驚生份个吹一陣又恬一陣，出海口个海浪，慢板慢板仔在該激啊激欸¹。無人出入咁个魚市場裡肚，就單淨留等，幾葩仔²孤栖个電火，還過，幾臺仔摧啊摧欸³个抽風機。

魚市場外背闊闊个停車場這片，犖花犖花仔⁴停等幾臺个自用仔。還毋想睡个駛車仔人，有人帶等罐頭來餵流浪狗，也有人帶等釣槓仔來湊月光釣魚仔。魚市場該片遠遠个停車場邊脣，幾下个越夜越有元氣个後生人，載等掛有大喇叭个音響，同車後斗撇向天、三臺車仔比比企，在該咚滋咚滋⁵尋月光共下跳舞。

右手片个音樂聲撓到吾腳底癢癢，毋過，左手片騎等過个兩臺奧多拜，錫著吾个目光。佢跔等佢兜个身影，行上兩百八十公尺長个笨鯊橋，想去看啊，掛等頭燈个兩個網魚人，係愛網麼个魚仔？月光也勾頭出來咁，一浪一浪仔个水紋，在月光下看到清

清楚楚，一張魚網、兩個網魚人，落網、收網，撈起來个係一網个月光。雖然，連魚屎仔都無，毋過，佢兜還係有講有笑，佢想，佢兜怕係為著愛打嘴鼓來个，網魚仔，單淨係兩同年想在月光下共下奈个理由定定。

橋下个河壩水，也認同吾个想法「係啊，係啊！」緊應緊大聲，佢緊聽緊生趣。毋過，同佢看真來，該「係啊，係啊！」个聲說，怕係河壩水分海浪打轉來，抑係海浪激上河壩水个聲啊！

毋多知仔，就分佢行過笨鯊橋咁。橋這片，日時頭分人箭到轂轂个自行車，這下通棚一列列仔企好、企正，在月光下恬靜。光華華个路燈下，無人上下咁，就單淨看著一隻揸等螺殼个毛蟹，對白沙堆勾頭出來又囡倒轉去，對路脣趟過來又趟倒轉去，自家在月光下搞囡人尋。佢企在路脣，看毛蟹、看流流流流个河壩水，在共樣个月光下，已像分佢看著咁，頭擺，該一大陣笨鯊入港時，客家打漁人佢兜面項个笑容。

¹ 激啊激欸：音 gieb a gieb e`；液體來回晃動貌。

² 幾葩仔：音 gi` pa` e`；幾盞。

³ 摧啊摧欸：音 kog a kog e`；此為形容機器轉動的聲音和狀態。

⁴ 犖花犖花仔：音 lo fa` lo fa` e`；稀疏間雜著其他花色的樣子。

⁵ 咚滋咚滋：音 dung` zii` dung` zii`；形容電子音樂的節奏聲。